

Paulsh PHILIPPI kuhtée akchiwakíialaxuahcheesh ala kuss baawaalaátdeehcheesh hinné koók.

“Shóotaachi?” hek Paulsh.

1 Awaasúalahum Philippi huuash kuhtée koon akchiwakáaush Christ Jesus aláxpak dii hawátkaatuuash deéla dís bacheeíttaahuuash dak ak dii kuxshéesh acháappaa hinna baa baalaáche díilun díiluss díawuuk. Paul huuash bíik. Awáxpe Timothy huuash koóm Christ Jesus ak iláakuum ak baa hilakuúosh bíiluk.

²Baksáau Akbaatatdía dak Jesus Christ Baxxiilaatúuash kóosh dak dii daásdeedalakuuash ko ii al ítche áalahkuuash koochihtéewiam awáxpak bahchiwakáauk.

Paulsh Philippians ala chiwakáakuuash

³Shóon dii bassihchít ammaa ii dii bahchichéwahche ii bas Akbaatatdía kusseeé “Ahóoh.” baaik. ⁴⁻⁵Deéla ko baapéesh hinna Baleiichiweeítcheesh an dáhkalattuuwasseesh koottaléesh aa hilaakée kóosh díixaxua bii aláxpak baa díaluaa ítchiluuash kal ii hinna Baleiichiweeítcheesh bilaxpáake kalako ii éhkuulak baliatuuk. Iwak ii an bahchiwakíitatchee díixaxua bahchiwakáawalakuuak koon baawihkammáachik. ⁶Hinné kootíihmaachim éwahchek.

Akbaatatdía al ítche kuss dii kulussáalawe aa Jesus Christ ala chishshíwíash ko baapé híihmaachik. Koottannák kan dii annawitáahiliihmaacheesh balásduupassaak. ⁷Kooták. An dii awáchissuuash Akbaatatdía baa an bii dáhcheesh an bii dáhkuksuuash ítchiluum heelassheen díixaxua dii baa baasshihtawalákuuash annámmaak. Shóon bii daxtúu xuh hinna baleiichiweeítcheesh bilaxpáake ishóochissaawaalak kootkaáshim al éwahche baachiweék. ⁸Hinné ala koottáhíleesh koóm Akbaatatdía éhchek. Christ Jesus an dii íchissuuash hinna an dii bii íchishshihkuuash ko kala koottáhílik. Kon bii áakaawachihchem díixaxua dii awákaawissawakaauk. ⁹Heem ammaa ii bahchiwakáawalakbakaauh hileén koók. Kanna bach aláchissaalaliolok haak ammaa ala koottáhíleesh al élahkuuash shóossalaht ii díaluulak ¹⁰haak an dáhkalattaak baa an díalaaliilush daacheesh dii éhchehcheoh. Hinné kal ii bahchiwakíiash kal ii baa dáhkalattaak díalaak kalako ii xaxúa élahchekaasuash koók. Iisakkússee shóon Christ chishshíilak baa chilasshihchiwíak. Hilaakée ko baapé ammaa iháatdialuuleetak ammaa díhkaxsuuleetak ammaa dii aaliíoleetak dii ítchikaatuulak ko ii bahchiwakíik. ¹¹Haak Akbaatatdía ammaa dii dáhkuuash koótdaawialuulak Jesus Christ dii baa áakaawachihkuulak koótdaawialuulak kootíihmaachim ko ii bahchiwakíik. Koótduulak kalako ii hileen bilaxpáake kúh Akbaatatdía chikittaakuuák dáashe dáasaasuulak baliatak ko ii koótdaak. Koótduulak dii íkuulak Akbaatatdía bilaxpáake hoowikáattaak baa tátchihkaak baa annawikaáshihcheihm éhkuulak baliachik.

Paulsh baa shóotaache

¹²Bakúpkaatuu hinné dii éhchewahchewiawuuk. Hinna baa ala chúuss baaléehtaa bii hiléessaawiohtaa kootáa bilaxpáake baleiichiweeítcheesh baachiwaáuk. Heehtaa bii dúttak bii daxchílom kalako ii hinna baleiichiweeítcheesh bilaxpáake ak iikukkó kanna áxpíhkaalawik. ¹³Kal íwahkooteesh akíssatdeom bii dáacheehkuuash dak kootáa awaasúuiseesh akíssatdee ak íassee xaxúa dak awaasúualaho hileen bilaxpáake al ahó ak kooléesh dak hinna Christ is baaliichiweeítcheesh aláxalaa déwahcheesh kalako ii

bii daxtúum éhchekaasuuk. ¹⁴Hileén bii daxtúua héelapko Akbaatatdía an bii kuxsalaachéesh ak baa kalátcheesh al ahó íkaakaak kalako ii Akbaatatdía kúh ala kuxshiwía an bakúteen iluuakuuwíash kalatchekaasáauk. Heem kannaa iisásshiak ii baa ala xaxxúuleetak hinna Akbaatatdía al ilíia baatcháacheesh ii aláxalaa déehkuuk.

¹⁵⁻¹⁶Iwak ak baa kalátche ham bat balíiwahkalattuum Christ is baa al iichiweéitcheesh baawilísshissaaq asiitkaashbuuk. Heem bach awáxpak aláxalaa déewahkaawakaauk. Bii íchissak Akbaatatdía koóm hileén bii dúushiiash al ilíia ítchikaasheesh ko bii óhchipchihchewiam éhkuum Jesus Christ is baa al iichiweéitcheesh bii áxpak baa éhchehkuuk. Deéla iwak ak baa kalátcheesh iháaum kúh bii óolitak bii iichúulaak Akbaatatdía an bii ii baa hiléesh kúh kootúulak hiliatuuk. Bii áxpilishtehkaak bii iichúuleshtehkuuhtaa kootáa baleiichiweéitcheesh aláxalaa déehkaak aaxualichíssuum aliipaátdeetak. ¹⁷Kooták. Christ is baa al iichiweéitcheesh kúh baa éhchehkuuk. Heehtaa daasalakootúua ítchissuuk. Akbaatatdía al ii bii baa hiléesh ílulh kootúulak hiliatuhtaa an baa dasshihtúuash iháatak. Hinna hilíateesh bilaxpáake ahúm písshe daáulassheen awóolitak iichúuwelak hiliatak bii daxtúum héelapko kúh ii bihchi baailíshekaashbaalak hiliatkaashdom kootássaak. ¹⁸Is biipúusaapdak íwahkootuuk. Heehtaa alíipdeetak Christ is baa al iichiwéesh bilaxpáake kuss ii aláxalaa déehcheesh kuhkaláht kal ii balásitchik. Daasúua díataahiluu xuh baaleetdak kuk kala shóohtaa shóotuulahtaa it ii baawihkammáachik.

Haak baawihkamáatbaakahkuwihmaachik.

¹⁹Hinné kal éwahcheesh koók. Akbaatatdía kusseé dáhchiwakaawiilakuuash Jesus Christ koóm Baleiláaxbaaxpaam bakóosh bii kuxshéesh kalako ii hileen baa baalúuum chúuss baaléesh ii bii kuxshikaáshiihmaachik. Kalako ii bii áake sáasaalaatak kan bii dússhipbloom ko ii baawihkammáatbaalicheesh koómmaassaawiik. ²⁰Kala shóohtaa shóotdaht an baa bulusshítdeetak an baa bihkaxshíleetdassheen bii áake déaxalaachim éwahchek. Hinna dúuptako an bii bilaxpáake an bihchi bulutchéesh deéla shóon baashbiáwaalak an bihchi bulutchéesh

Christ bahchikitchéesh ammaa díawaawakoosh ammaa sheewáawakoosh xaxúa kal ii koochihtáweesh balasé chichútbahkaak an bii baa ala xaxxíleeteesh ko ii kooták. ²¹Bii bilaxpáakdak Jesus Christ bahchikittaawakbaalitbiáwaak baa biipéesh kuttáchik. Heehtaa baashdák Jesus Christ awáxpak bii koonnák kannaa heetashtéihmaachik. ²²Deéla it bii bilaxpaakéelak Christ an bahchikittaawakbaalichéesh dak ammaa díawaawako ítchiwaak. Heehtaa dúuptako shóotbaawiawaalak bii bilaxpáaka xuh baashdák shóokee ko ittéelak baalaaxták. ²³⁻²⁴Christ awáxpak bii koonnák ko heetashtéihmaachik. Hinna awé áakeen bii kooléesh kuk baaleetak. Heem hinna awé awíhchish baaléewisshik. Heehtaa an díhchi bii kuxshílahcheesh ko ii it bii bilaxpáakeesh kuk ko bas biipkaaséek. Kalako ii Christ it kuss baalewiawaasséek. Kalako ii balásalakootdeetak hinné dúuptako shóokee ko díawaawiawaalak baalaaxták. ²⁵An díhchi bii kuxshílahcheesh kusséesh kan balásduupassaak. Heem bilaxpáakbewiawaam díss baaléem kalakoon díixaxua ii bach awáxp baa díawaawohmaachim kal éwahchek. Kalako ii Christ an dáhkalatcheesh kannaa itchikaaséehmaachik. Kal íwahkootesh kal ii baalíhkammaatdohmaachik. ²⁶Kooták. Christ Jesus kala chii dii bii kuss chishshíhchewioosh kalako ii dáashe báaxxiilalohmaatak kusséesh ii “Ahóoh.” daalohmaatak an baalíhkammaatuush baatcháachiimaachik.

²⁷Christ an dáhkalattuush ko kan bii kala kootdásheen baleiichiweéitcheesh dii baachimíhkuum ala koótduuash bat shéessee an díhchi dilúttuuash ko kootáalah. Dii awákaa boó xuh an dii biikukkóosh aweeláaxaasak bach aláxpak baa díaluush ak dii iichúulaak hinna bale iichiweéitcheesh kúh ak iichúuleesh díikukkussuum ko ii éwahchek. Christ is baa al iichiweéitcheesh dii kalátchehchewiassaa baa ihée dii kalátchehchewioo díikukkussuum kúh éwahchek. ²⁸Hinna baalíhkammaatak dii baa ala xaxxíleeteesh kalako ii ak dii iichúuleesh dáaxaxxissaa dachíliissaataahileesh kúh éwahchek. An dachíliissuuash kalako ii Akbaatatdía xawíikaassaak baa hámneettaahileehmaachim éhcheohmaachik. An dachíliissuuash kalako ii Akbaatatdía dii íassiak dii iléehmaachim hilaakée dak ii baa koochihtéesh

élahchelohmaachik. ²⁹Ii kootéesh Akbaatatdía al ii dii ítchikaassuush Christ dii kalátchekaashihchek. Heelem Christ an bahkaláttuuash bíluh ko ii Akbaatatdía balee baa chúuss déehchewiak. ³⁰Heem hinna íwahkootéesh hinné chichéhkaalah. Hinna Philippi kuhtée bii koolám bilaxpáakuum ammaa bii chúuss déehkuuash baatcháachkaassuush alákuuk. Hinna Baleiichiweeítcheesh ak iichúluum hilaakée dii baatcheesshíiakaau koottaléesh bíh bii kootúuk. Heehta koómnaassaak dalásatchutdahkuum éwahchek. Hinna an baawalaáche an dáamnuuash bilaxpáake iháaum it bii kootúum ii élahchelohmaachik.

Christ ala cheéshdeesh dak baa íschiisaaleeteesh dak.

2 Christ balee piishko páachileesh bíluh kalako ii bat piishko bapchílewiiilush daachik. Christ balee íchissheesh ii balee chilaschéesh bíluh kalako ii bach awáchisshiwiiilush daatak bat bahchilaschikaáshbiiilush daachik. Baleiláaxbaaxpee koon bíluss ilák bíluh kalako ii bach awáxp balíwiiilush daachik. Christ bílussee balee daásdeekaashbilikkuuash bíluh kalako ii bat balásdeewakbiiilush daachik. Christ bahkaláttaak Akbaatatdía is bilaxpáake awáxp baa díawuulak kal ii iwak xaxúa díawaawiwuulak kootíhmaatak díawaawiiilush daachik. ²Baleiichiweeítche al ii dáhkalattuaa hawátkaattaalah. Daláshawattaak bach íchissalah. Bach áxp baa hiláalah. Bat shéess baawísh íttaalah. Dii íkuxxache Baleiichiweeítche éetshii déehkaalah. Koótduulak bale daásitche aalasshipím ii bii íaxuaihmaachik. ³Baa an díaluuash xuh ii baaíaleetassaa xuh ii bat dashshipbáassaak dilíwaaialeetdewiassalah. Baaleettaa ak cheéshdaalah. Díinnaxuoosh bat chikittaakuuák bat baa ánnuuosh ko bassáhkaalah. ⁴Díixaxua díiluttach díhchi dasshihchíssaalah. Heehta kúh bach íkaakuuak bach kuxsáalah. ⁵Christ Jesus ammaa ískusseesh an baa íkeesh an baa dasshihché díluh kala kootáalah.

⁶Akbaatatdía ala kootéesh Christ Jesus kúh koottáahilik. Heehta Christ Jesus alasáashiiwaaxpeesh dak an baatcháacheesh dak an báakaacheesh dak hilíilak Akbaatatdía ala kooté íh kala koottáhileesh xaxúa dúushiik.

7 Itchihk kal íltaa hilíilak akítchileesh kal ii díassaak dúushiik.

Iwahkoocheesh hinna awé áakeen bishdaak bilaxpáake ala kootúuash koótdek.

Haak ittákkaa ak baa ishkawáashdek.

8 Kalakoon ak cheeshdeesh ii an bilaxpáake Akbaatatdía an baa an díahcheesh día aa ala shée aahíik.

Hinna an baa kalátcheesh an báakkussahkeesh aahíik.

Kalako ii dútchixawiikaassuum baawatbakálaam kuss dakkaasúum koon shéek.

9 Kalako ii Anmaaiwaakoochihtéesh kuhtée kal an báakkussahkeesh Akbaatatdía dúttak báaxxiak koon dúushiik.

Deéla ammaa kúuash bale dáashim ítchim dak an baatcháachkaasheesh dak kal ak baa íkuchke koóhchem kal ihée koótdeetak.

10 Akbaatatdía ii íwahkoocheesh báakukko dak awé dak awé awúua dak ammaa ala kooléesh xaxúa Christ Jesus chikittaakuuák kuss chiwakáaulak hiliatak

11 ak kooléesh xaxúa al iikukkúuan hilíashiiok.

“Jesus Christ baatách xaxuatáahilia baa báakkussahke baa ífschiisaaleete koók.” huulak hiliachik.

Kalako ii Akbaatatdía koóm Iilápxe kóosh dáashe báaxxiak ala chikittaakúuash kuúohmaachik.

Christ an dii bilaxpáakuua ii baa xíssaahkaalah.

12 Biilápaachkaatuuan hinna íwahkootéesh an dii an díawahkuua díaluuash kal ii íkuxxache díakaalah.

Bii ala koolé dak bii ala koolássaahaa dak an baa dáhchiwakiiash díataahilaalah. Bilaxpáakuum Akbaatatdía iléesh an baa annamníoosh kúh akúkussahke aalaliáf díalaawialaaliilush daachik. 13 Akbaatatdía iiaxúa ammaa dii díahchewioo dalásawuuan dúushiilassheen díalaawialuulak kootáhcheihmaachik.

14 Ammaa díaluuash xaxúa Akbaatatdía dak dís bassáalituuash dak kaláttaalah. Baa aashtáchissaak dilaáhissaak ammaa dii díahkuuash díaalalah. 15 An díhchi dilúttuuash íwahkootaalah. Koótduulak bilaxpáakuum baa kalátchessaak baan áxp baa hilaachíssaak baa

tátchissaak baa kxawíihileesh héeleenuulahtaa diiluk an baa díhkaxshileetuum ammaa dii al aaliíoleetak. Kalako ii al ihchi dútchiilush daacheesh xíassaakaashdaak éhchelakhuuk. Bilítaachiia dak ihké dak sáashiikaasheesh an baáu xíassaakaashiiluash ko kala koótdaalah. ¹⁶Akbaatatdía ammaa íkuchke ii an bilaxpáakuua ii baa koochihtalaatbíoolak kootíhmaachim éhchekhaalh. Heelak an baa díaluuash iiláxiwaawihmaachik. Ilak ii dii baachiwaáu dii héeleenmaalak ammaa díawaakaasheesh ittákkaa díawaassaak. Kalako ii Christ ala chishshía ko baápbishdak dii ii koótbaak baawihkammáatbaatchaachka ashbaawihmaachik. ¹⁷Aaláa Roman bacheeítchikaasheesh koóum bii dappíolok kalako ii bas íile xéih. Kootdák hileen akchiwakíiwacheeitche baáchuuwilaxxee ii páaxxuuash Akbaatatdía kuúolak ko kala kootíhmaachik. Diiluk Christ an dáhkalattuuash chichútduulassheen Akbaatatdía kusséesh baatách xaxúa díhchi dákuuk. Ii koótduuash ammaa dii díahkuuash xaxúa díalaalohmaachik. Akchiwakíiwacheeitche Akbaatatdía kusseé an baaaaleéash ko kala koótdaalohmaachik. Kal ii kootéesh biixaxúa Akbaatatdía kusseé baatách xaxúa an bihchi bakúuash ko ii baawihkammáatbaalitbihmaachik bii dappíolahtaa. ¹⁸Haak biixaxúa Akbaatatdía kusséesh baatách xaxúa bihchi bahkukúum díiluh dalásittaak baalíhkammaatdiilush daachik.

Timothysh dak Epaphroditus dak

¹⁹Baxxiilaatúuash Jesus kon bii kuxshím saskáat Timothysh díiluss húuwahchewiaweesh kootáhcheihm baliachkaashik. Ii koótbaawihmaacheesh baa an bii ala kootéesh dii chiwaáulak ii dalásitchilohmaachik. Shóon chishshíilak díiluh baa an dii ala kootúuash bii chiweéihmaachik. Bíh kalako ii bii píishko páachilaak ii balasé ítchiihmaachik. ²⁰Balee héele Timothysh ala kootéesh awáxpeesh héele ak koótdeetak ak dii baailísaakuuash koók. An dii ala kootúuash ak éhchekaashbiash Timothysh koók. Bittáchissaak. Heem Timothysh koóm ammaa díiluss déewahchewiaweesh koók. ²¹An basshihchéesh hileen hawéese xaxúa ammaa an déewahchewiish daacheesh íluttach ihchi dasshihchíohmaachik. Jesus Christ daasalakootéesh kuss

dasshihchíssaahmaachik. ²² Timothysh baa bilaxpáakdaht ala kooté élahkuum Akbaatatdía dak hawéese dak an baa hilakúuash ítchikaassheesh dii íkaahkuum Timothysh bii áxp baa hilikaásak kal élahkaak Jesus Christ is baa iichiweé ítcheesh aláxalaa déehchem élahkuuk. An bach awáxp baa díawuuash kúmmaam iisáaksheem iilápxe áxp baa hinnák ko kala kooták. ²³ Heem baláshawatbaak hinné díiluss déewahchewihmaachik. Heehta bii shooleelitdak koochiik éwahkaak hilaa déewahchek. ²⁴ Kala shóohtaa shóotdaht it balásduupassaak kala saskáat Baxxiilaatúuash bíh díilusse baaléewiawaam kootáhcheihmaachik.

²⁵⁻²⁶ Haak deéla Epaphroditus huaa biilápaachkaateesh koók. Bat bahkuxshíiluk. Ammaa baalúulak ammaa chúuss baaléesh hilíilak bii áxpak chúuss déek. Akíssatdee ammaa chúuss daáulak ammaa baalúuhiluulak bach áxp baa hilíiluash ko kan balee kala kooták. Ammaa baalúuliaweesh chúuss baaléelak bii kuxshílahkaak bísee ko ii húulahkuuk. Díixaxua dii íkaaissak ii ihchi baailíshek. Deéla baakuhpáam an díikukkuum éhchem kúh ii ihchi daáxawiihchek. Heem hilaakée balasé díawaak kal an díiluss chishshíwahchewiawaak. ²⁷ Kooták. Baakuhpák íkasshe ii itta shéelaak. Heehta Akbaatatdía an balee daásdeesh hinna Epaphroditus óochiahchem ii ishtatáachisheesh ii bíh balasé itték. ²⁸ Hinna íwahkoteesh kalako ii biiwachíssaak díilusse saskáat déewahchewiawaak. Iwak díawaak kala chii alákuulak kal ii baalíhkammaatuulak baliachik. Kalako ii bíh an balásxawiiash koomnák baliachik. ²⁹⁻³⁰ Ak bii kuxsawakóosh dii annaachíssatuuk. Christ an baa hilakúuash itta ii shéelahtaa koowéessaak. Hinna íwahkoteesh kalako ii al alóhchikaapuuash ii baalíhkammaachkissalah. Baxxiilaatúua ak kalátcheesh an bach óhchikaapuuash ko kala kootáalah. Epaphroditus ala kootéesh dak ak kootéesh chikittaakuuáalah.

3 Akchiwakíwakupeen it ammaa ii dii awáxp balíwiaweesh hinné koók. Baxxiilaatúuash kuttáche ii dalásitchikaashdakaaulak kala koók.

an baa táchikaatam koottáhileesh

Hinné íschíisaa dii baachiwaáuwishihtaa hilaakée kala chii díiluss baawalaátuuash beésshiaweéchissaa. Dii kúawioolahtaa an baawalaácheesh ii aliilúuleetiimaachik.

²Hileen bilaxpáakuum ditchiláachkaasak baa chikittúuleeteesh kooté alaxaxxáalah. Baa iháat ak ii baa baachimmíhkaak ak baa kxawíilioosh alaxaxxáalah. Díhch íassiaalah. Ammaa dáhkalattuuash dii iháass aaléewiak kootáa dii áaxxaapashkaahmiaohmaachik. Al áaxxaapashkuuash kuttách hilaa ii Akbaatatdía is bilaxpáakuua dii hawáhchewiok. ³Iwak bilaxpáake “Al áaxxaapashkuuash ii Abraham is ílannee balee hawáhchem kootáa Akbaatatdía is bilaxpáake bíiluk.” huuk. Bii ahúum balee áaxxaapashkussuuhtaa Abraham is ílanneetaahile biiluan bíiluk. Kootáa Akbaatatdía is bilaxpáaktaahile bíiluk. Baleiláaxbaaxpee an balee kuxshéesh ko ii an balee an bilaxpáake ii Akbaatatdía bahchiwakáak baa díawaawakuuk. Christ Jesus kusséesh dáashe báaxxiwaak ii baa ítchikaashbeesh Akbaatatdía is bilaxpáakeesh ko ii balee hawáhchek. Balee axúia kuss baa an díoo kúh baa an díawuua Akbaatatdía is bilaxpáake ii balee hawáhkuuash bahkalátchessuuk. ⁴⁻⁵Iwak hilíateesh ii bihchi bíáwaassuuk. Baaleetdak al ii bihchi bahkuxshíwishdak biichihk áa díawaawihmaachik.

An bii bishé kalakoon bas baáhko sáhpuaam kalakoon bii áaxxaapashkuuk. Israel bilaxpáake ko bii hawák. Benjamin ashammaléaxxiia ko bii hawák. Hebrew bas ílannee dak an balíia dak an baa bahkalátche dak kala shóossalaht kalako ii baatách xaxúia bii Hebrew kooté koók. Bii Pharisee kootám kalako ii baleilíiaakaxpissuum Moses bilikkúuash bahkalátchekaashik. Kooták. Akian ammaa ala kootéesh hinné kal ii xíassaakaashihkuuk. Baa an díaweesh dak bii sapée dak ii bihchi bíáwaakaashdak ihée sapéelahtaa an bii ala kooté kóoxuuleetihmaachik. Hilíachiisaa hinna baa an díaweesh ii bihchi bahkuxshiwiáwaalak baaleetihmaachik. ⁶Kooták. Bilaxpáake ak awé alassihchéesh bii baáf sheewiak heelolak “Baleilíiaakaxpissee dússhishik.” bii helitdelelok. Ala kootéesh bilaxpáake baleilíiaakaxpissee kalátchewahchewiawaakaashik. An bassihché “Bilaxpáake Christ ak kalátcheesh baleilíiaakaxpissuuash haawéewiok.” balíatak ko ii kootáa baappiiawaakáhkak baatcheeshkaáshbaak haawitáahinmaawiawaawaalichik.

⁷Koottaléesh hinna baa an díaweesh ii bihch ítchiwaak baliachik. Heehtaa hilaakée hinna baa an díaweesh bahchilasshihchíwem koolíash baa hámneetak Christ kusseé kúh baa hámneetak. ⁸Hinna awé ammaa ala kooléesh al ii bihchi bahkuxshíleetak hinna Christ Jesus al éwahchewiaweesh kuk baatách xaxúa baa íschiiisaaleetak. Hinna an baa ískusseesh an baa íkeesh an baa dasshihché bíh koótbaawiiish daacheesh íwahkootbaalak kal ii bihchi bahkuxshikaásheesh koóihmaachik. Heem hinna awé ammaa ala kooléesh dak baatách xaxúa kan baa hámneettaahiluuk. Baa al ii díassua dak baa ala xawíia hawáxiwaaailuash ko kala kootúuk. ⁹Kal ii hilíatbeesh Christ bii eetáhinnak baliatak ko ii koótbaak. Baleilíiaakaxpisseesh kusséesh bahkalátchehtaa ii bihchi baa tátchiwahchessaak Akbaatatdía kusséesh baa annámmaassaak an bii íkeesh ítchiwaassaak. Heehtaa Christ an bahkalátchekeasheesh kalako ii Akbaatatdía iiaxúa al íkeen bii baa táttak baa ala kootkaáshe díawaam bii áakaawachihchek. ¹⁰Kooták. Christ éwahchewiawaak íwahkootbaak al éwahcheesh áxpiwahkaawaalammiawaak. Akbaatatdía an baatcháacheesh an baaxpéesh ko ii bilaxpáakbewiawaak ii baa koochihtalák baliatak Ischawúuan Dakkaasúua shéem chiléhcheesh Akbaatatdía an baatcháacheesh ii díash ko bii kootáawakdak baliachik. Akbaatatdía an bahkalátcheesh kalako ii baa chúuss baaláak ii baashdáhtaa chúuss baaléwiawaak Ischawúuan Dakkaasúua ii baashbakbíáwaak. Ischawúuan Dakkaasúua Akbaatatdía ala kalátcheesh kalako ii baa chúuss déesh ii saawakóosh ko ii koótbaawiawaak. ¹¹Ammaa díawaawiawaakaasheesh kal ii ammaa hilíatdak baliacheesh baashdák píishchiisaa kaka bii bilaxpáakahchewiam éwahkaak kalako ii Akbaatatdía bii kulutchilák basshihchíssaawihmaachik.

Ammaa dishóocheeleesh kuttách dasshihtáalah.

¹²Akchiwakíiwakupeen ala koottáhile al éwahchekeashe it baasák kaka bii chiléhchessaak. Kooták. It bii annawitáhilissaak. Heehtaa Christ Jesus ii bii pátcheesh ala kootéesh éwahkaak píisshe baaléelak hiliachim éwahchewiawaak ala kooté koótbeewiawaakaasak

balúuawaakahkuk. ¹³Christ ala kootéesh bik it bii kootássaak. Bilaxpáakeem xalússhilak kal iipatchíssaak iisásxualaak bilaxsheewíak. Heem kan bii písshessaawakaassaak baam díaweesh kal ii bihchi baassihchíwaassaak ammaa baa iishóocheeleesh ko kuss awákaak. ¹⁴Christ Jesus kusséesh bassihchikaásak al ii éwahcheesh áxpiwahkaawaalammiawaak. Iwahkootbaalak kalako ii ala kootéesh koótbee aa an bii bilaxpáake shóohkalak aawaawiáwaak. Ii koótbeesh Ischawúuan Dakkaasúua saawakúm baapéem Akbaatatdía bii ilíihmaatdak Anmaaiiwaakoochihtéesh awáxpak bii koolíihmaachik. ¹⁵Kooták. Díixaxua baa annawitáahinnaawialuulak an baa bassihchéesh dáassihchiliilush daachik. Hinna díluss an baawalaácheesh bii aaláashtatdak Akbaatatdía ílaa baa dii éhchehcheohmaachik. ¹⁶Akbaatatdía kal an balee baa éhchehcheesh ii an bihchi buluttúua koótbuulak koók.

¹⁷Akchiwakiíwakupeen díixaxua an díhchi dilúttuuash ítcheesh koowéessaak an díawe kootáalah. An dii bilaxpáakuua ítchiiak bilaxpáakuum al ihchi dúttuua an díawuuash ko kala kootúuash kootáalah. ¹⁸Ischawúuan Dakkaasúua baawatbakálaam koon saák ii ammaa kxawíhíluuash koowíio áakaawachihchewiak. Hileen bilaxpáake ahúm “Ischawúuan Dakkaasúua bahkalátchek.” huuhtaa ala xatáaush kalátchessaak iichúuluuash ii baa xíassaahchek. Heelak diiluk hileén ala kootúuash koochéessaalah. Hileen Christ is koochíash ala kootúuash ahú aa kal iíschiisaa kal ii dii awáxp biichiwáauhtaa dii éhchekaashbahchewiawaak ko ii kala chii dii baachiwaáuk. An baa hilúuash kalako ii balasé xawíia ii háaksee bíiwék. ¹⁹Baa annawéessaak baa ala kxawíia isítchiiak daasalakootúua ítchisseesh ko díawiook. Kal íwahkootaak Akbaatatdía ammaa díahchewiakaasheesh kuk díassuulassheen an baa hilúuash ii baa ilusshíchiilush daatak baaleettaa baa íaleetak ii apúua báakukko dfoolassheen hinna awé áakeen baa ala kooléesh kuttát ko dassihchéesh Akbaatatdía al ilíia kalátchessuulassheen kalako ii datchúshihkuua ii baa koochihtíihmaachik. ²⁰Heehtaa biiluk Akbaatatdía is awé ítcheesh balee ala kooláhcheesh koóm biiluk akian ammaa iháattuash koótbaassuuk. Hileen

bilaxpáakuum ak baa kalátchesseesh an dútchikxawiiawiash biiluk Baxxiilaatúuash Jesus Christ báakukkoko huuák balee iléewiam ko awóolak biiwaachíssuuk. ²¹ Jesus Christ baa an díawiash alínmishik. Heem shóon huulák an baaxpéesh an baatcháacheesh ii balee axúash saalawák ítchissaak baa ala kxawíia ii balee flutchikeesh balee kummílak ala kootéesh ko balee kala kootíhmaachik.

4 Akchiwakíiwakupeen dii awáchissuuk. Díiluss bii chichéessaak dii awákaawiwuuk. Ammaa an díaluua ii balasé íttak ii bapásee báaxxiwaak. Biilápaachkaatuu hinna an baawalaáche al ii dii baa awóowiiosh kalako ii Baxxiilaatúua an dáhkalattuuash ítchíikaassaakalah. Kalako ii díhchi dilúttuuash ítchikaassaalah.

ammaa dii an díawahkuua

² Euodia huua dak Syntyche huua dak an dii díawahchewiawuua hinné koók. An bat dilúpioo kala koowíiak bat shéess díss baawishíttaalah. Baxxiilaatúua dii aám dáhkalattuum díilapta bach áxpak baa hilák ala kooté koótdaalah. ³ Awáxpe sheeh Euodiash dak Syntychesh dak iilápte hiiák bat daáshawatchehkaak ii daáschiaxapiiah. Bilaxpáake ahúm balee iichúuluuhtaa hileen bíoom bii kuxshikaásak baleiichiweeítche bii áxpak éetshii déehkuuk. Deéla Clement huush dak ak bii áxp baa hiléesh xaxúa áxpak kúh kootúuk. Anmaaiiwaakoochihté dáasuaa koon baalaátuuash dáasuaa héeleelum an bilaxpáakuua ii baa koochihtíhmaachik.

⁴ Hileen an balfía iiháake koók. Baxxiilaatúuash dii aám is bilaxpáakeesh ko dii hawúuk. Kalako ii baalfhkammaat aasúuadakaaliilush daachik. Kala chii íwak sheewáawiik. “Baalíhkommaataalah.” ⁵ Bilaxpáake xaxúa daásdeeak kuss díss baawishíttaalah. Iwak ii sheewée Baxxiilaatúuash kal áhtak. Kala saskáat húuihmaacheesh kalaaxtássaalah. ⁶ Baa dalásawuuan daatdeettaalah. Baaleettaa kala shóohtaa shóotdaht Akbaatatdía kuss chiwakáalah. Ak dii kuxsakaáush koóm ammaa dakúuweesh chiwaák “Bii kuxshíh.” haalah. Deéla kusseé “Ahóoh.” haalah. ⁷ Koótduulak Akbaatatdía baa dalásawuuan daachíhchessaaihmaachik. Kooták. Baakoon ítche dii daachíhcheihmaachik. Bilaxpáake dak

áaxxee baa ala koolé dak kusséesh an baa dáasshihche baa annawéehmaachik. Ii koochéesh an dáhkalatchekaasheesh ko ii xaxúa kootáhkaalakuuk. Heem kan baa dii chúuass déelak kootáa it baakoon ítche dáakahkulak sáapii kootdák dáalaaxtalohmaachik.

⁸Akchiwakíiwakupeen baa hawátam kala chii baawalaátbiawaak. Hileen xaxúa Akbaatatdía baa isítche dak hileen bilaxpáake ammaa ítchihkaak ii iláaush dak dáasshihchiliilush daachik. Hileén koók baa ala koottáhile dak baa ala hoowikáate dak baa annawé dak baa baaxpée dak baa al ítche dak. Iwak kala ko an dii bilaxpáakeesh ii xachíihkaalah. ⁹Ammaa dii baachimmíwahkuuash xaxúa dak ammaa sheewée an díikukkuuash dak ammaa díawee al alákuuash dak díinnaxuoosh kal an díalaalakaaliilush daacheesh koók. Hilátduulak kalako ii Akbaatatdía dii bakúteen daachíihmaachik. Kalako ii an dilápaliioleetak dalásuua ilúxalaa dilúshiilohmaachik.

Philippians kuss “Ahóoh.” hek Paulsh.

¹⁰Baawihkammáachik. Íschiisaa ammaa díalaawiilakuua ítchikaashduuash bii baalilísuum ii koótduuk. Kalakoon bii dáhkuxshiwialuuht annúleetaht bii dáhchichelahkaalakaaum éwahchek. Hilaakée kala chii an bii baalilísuuash ii baa xíassaalahkuuash ko ii baawihkammáachkaasak Akbaatatdía kuss “Ahooh.” baaik. ¹¹Baa baakúummishdak ko ii íwak sheewáassaak. Akbaatatdía baa an bakó baalúu xuh shóotdahtaa díawaassaassaak. Kala shóohtaa shóotdaht kal ii an balapáleeleetbihmaachim éwahkaak baakoon ítawaalichík. ¹²Baa ala shíshiaahe kúh an bihchi bulutché éwahchek. Hinné koottáhilik. Bi taxpáshi xuh balíishi xuh bii baatcheeshí xuh bii baatcheeshíssaalak an bihchi bulutché éwahchek. Baakoon balasé buluxáak baalichík. ¹³Akbaatatdía baa baatcháache bakóosh ko ii baa an díawaawiiish daache awáakaawachik. ¹⁴Ammaa díalaawiilakuuash xaxúa baakúuwissaahtaa díilussee “Ahóokaashilah.” baak. Baawilísaak baa chúuss baaléesh an bii an dáhkuxsuuash díiluh ko ii dihchi baa chúuss déelahkuuk.

¹⁵Philippi ak kooléesh ak baa kalátcheesh díiluh hinné élahkuuk. Awám Macedonia huua bii kooléesh

baleiichiweeítcheesh diichihk áa dii baachiwaáuk. Dii bii héeleeluash kalakoon Macedonia koon baaléesh kukáakan ak baa kalátcheesh ammaa díawee kusseé ak bii kuxshéesh díiluttachkaatak. Ammaa bii dákuuash kalako ii hileen ihée baleiichiweeítcheesh ii baa chimmíwahchewiawaalak kootíhimaachik. ¹⁶Awaasúualaho Thessalonica bii kooléesh kúh ammaa baakúuweesh an bii dáhkuxsuuash hawáttaassaak dúppaalichim bii dáhkuxsuuk. ¹⁷Bii dáhkuxsuuash ítchiluhtaa baa bii dákdakaaaulak baliatak ii hilíashewaassaak. Itchihk Akbaatatdía an dii baa áatchinnaachihcheesh ko baakaanmalákoosh bas biipé koók. ¹⁸Ammaa bii dákuua xaxúa Epaphroditus bíss ólahkuuash kalako ii hilaakée ammaa baakúuweesh xaxuatáahilia kan beék. Ammaa bii dákuua Akbaatatdía baa dákitchiluulak ko kala kootám xaxuatáahilia ii “Ahóoh.” haak isítchikaasshek. ¹⁹Deéla Akbaatatdía al ii dii kuxsúuash kuk kal ii baa koochihták. Ischawúuan Dakkaasúua saawilikkúuash kalako ii ammaa baakúuwuuash xaxúa ákkuuwiiawilikkuum bulutchíwohmaachik. Heem ammaa dakúuwuuash xaxuatáahilia Akbaatatdía kuk kan díalaldakaaohmaachik. ²⁰Heem Baksáau Akbaatatdía dáashe báaxxiwaawook. Bilaxpáakkootaa ala chikittaakuúosh ii baa koochihtíh. Ahóoh.

“Kala chii shóotaachi?” baak.

²¹Akbaatatdía is bilaxpáakeesh xaxúa óhchikaapbakaalah ii íkuxxache Christ Jesus ak kalátcheesh. Ak bii áxpak ak baa kaláttaak Akbaatatdía ak baa hilakúuash ak hileeléesh xaxúa díiluss “Shóotaachi?” huuk. ²²Hilihtée hinna awaasúualaho kúh koon Akbaatatdía is bilaxpáake díiluss “Shóotaachi?” huuk. Bacheeítchikaashe Caesar huuash aasúua ak koon baa hilák deéla kúh hám baa kaláttuum dii chichéhkaalakak díiluss “Shóotaachi?” huuk.

²³Baxxiilaatúuash Jesus Christ dii áatchinnaachihkuuash ko ii al ítche áalahkuuash koochihtéewiash ko ii bahchiwakíik. Ahóoh.